

紹興府志卷之五十

人物志十

鄉賢七

國朝

沈文奎會稽人少時寄養外家冒姓王氏年二十爲明諸生北遊遵化天聰三年

太宗文皇帝征明文奎隨衆來歸

命直文館後隸漢軍鑲白旗六年明守臣輸貢議和

召賜文奎饌

問和議於爾意云何文奎奏曰漢人以宋轍爲鑒俱諱言和雖

紹興府志

卷之五十

人物志十

一

以

聖主好生之念欲安息待時而漢人反以我爲可欺邊塞小臣區

區盟誓安足信哉崇德元年甄別內院人員文奎列一

等第二

賜人戶及牲畜等物授宏文院學士七年八月以飲醉乘馬失

避

御前儀仗論死

上特有之順治元年授保定巡撫駐正定明三關總兵郝之潤既

投誠旋解任率部卒馳至倒馬關文奎慮釀成禍患令

總兵吳兆勝疾馳赴鎮以備不虞而密疏收其所部先

是畿南未定土賊蜂聚大名保定間所在千百成羣焚掠村堡一賊聞勦羣賊援拒文奎訓練兵士設策勦撫賊黨趙崇陽等數百人絡繹歸誠會寧晉叛寇韓國壁等抗師負固文奎卽遣崇陽星夜擒勦陣斬國壁復遣署總兵王燦等討滅香爐寨賊渠錢子亮喬家寨賊渠趙建英別遣守備劉文選等攻圍深州賊渠于小安胥州賊渠馬數全所至賊巢蕩洗於是冀州賊郭世先保定賊李庫內黃賊李君相順德賊袁三才等數十渠魁一時並就俘戮賊黨解散畿南始定保定等府賦課猶沿明例有優免太濫及攤派厲民者文奎奏一切槩行

禁革明年疏言畿南兵燹之餘民力困竭每歲解京綿絲等物請俱改折色又疏請各衛所錢糧令州縣徵收屯丁兼屬管攝軍宅屯莊槩入保甲至邊戍旣裁軍裝雜貳之需應行革除並見採擇四月天津土寇李聯芳張成軒等橫行南皮鹽山間文奎遣都司楊澄等間道馳勦擒斬聯芳等九十三人調陝西未赴復留保定五月擢淮揚漕運總督至則淮揚徐三府方遭高進忠魏用通高陞之亂文奎先諭降進忠營將孔道興等八人進忠等遂潛遁入海有僞招討鄭報國僞兵部司邦基者假擁立明宗新昌王爲名訛言惑衆於是魏明通高

陞復突入河內文奎擊斬高陞遣遊擊裴應暘與孔道興等追斬魏用通於白駒場賊衆殲滅殆盡鄧報國司邦基爲其下擒縛以獻進忠走崇明降十二月復擒斬如舉叛渠於錫凡劉一雄等散其餘黨萬餘人海濱底定三年奏增設淮北淮南淮西各道標營兵戰艘八月邳州土寇楊秉孝王君實等將攻邳城文奎率淮徐道張兆熊擒斬之十月疏請禁革漕弊不論官戶儒戶濟農名色槩令有司與民戶一體督催及時上倉著爲令四年以擅免荒田稅賦又續請明朝陵寢祀典革職五年起補宏文院學士充纂修

紹興府志

卷之五十

人物志十
鄉賢七

三

太宗實錄副總裁官二月充會試主考八年四月復總督淮揚漕運疏陳漕政四事曰慎選運官曰清核舍餘曰合選殷丁曰清勾黃快屯丁十年膠州總兵海時行叛奉

命偕直隸河南山東總督馬光輝統兵進勦軍次永城兩路夾擊俘斬甚衆時行自殺其黨李文進率所部降文奎以功加一級廕一子時江北廬鳳淮揚等府州縣水旱相繼文奎請將十年漕糧照被災分數議折九年前宿逋酌量蠲免部議往返咨駁各屬候覆至冬盡猶未開徵十一年通泰海濱叛寇朱周錡稱僞號文奎遣兵擒獲悉誅其黨又奏墾江北荒屯地九千九百餘頃是歲九

月以催運稽遲降三級調用尋補陝西督糧道卒於官

國史館列傳 俞志文
奎字清遠世居曹娥村

胡兆龍字子衮山陰人生有異質童時善屬對或吟咏輒

矢口而成順治丙戌進士以庶吉士習

國書及典史籍凡吏禮兵刑徭賦所有沿革損益無不洞然
出典楚闈試黜浮崇雅號得人

世祖皇帝御試稱詞臣第一以侍講學士纂修

太宗皇帝實錄歷學士凡

幸瀛臺

駐南苑兆龍多扈從尋充會試副總裁所取皆名士爲日講官

紹興府志

卷之五十

人物志十
鄉賢七

四

纂修

聖訓教習庶吉士署吏戶二部侍郎晉大宗伯膺

上眷有才品端練之諭予告歸卒年三十有八

李志

吳執忠字匪公山陰人少從父越川遊三韓受知親王特
簡總理叅與政務其時親舊散失者多方收恤之仰食
於執忠者幾百家迨扈從入關值開科取士執忠以宿
儒欲辭職就試親王慰留之遂與明經之選初令豐潤
報最召拜御史備兵漳泉輕舸入險宣布恩威招海澄
黃梧傾心歸順再備兵懷隆三遷湖廣糧儲叅政值李
孽倡亂三省會師征勦執忠跋履行間多方措置

朝廷嘉其績封父如其官後謝病乞休撫三孤姪俱成立優游林下者數十載子與祚自有傳

李志

一陳可畏字伯聞諸暨人寄籍山陰順治壬辰進士司李廣信時當兵燹後獄訟繁興可畏涖郡曲爲撫循民賴以安擢吏部稽勲主事遷驗封歷考功郎尋改御史視鹺兩淮巡東城值歲大饑俟賑者雲集都下可畏特疏展期自冬迄秋一歲中全活者以數萬計庚申冬

上親試臺垣擢可畏居上等掌京畿道卒于京所著有思補堂集十卷西臺疏草十卷三山放言八卷子大經官吏部司務能世其業

李志

紹興府志

卷之五十

人物志十

五

徐化成字文侯會稽人順治丁亥恩貢歷官廣東河南左右布政所至有賢聲巡撫湖廣侃侃持風節楚民至今思之

李志

陳景仁字子殷山陰人順治己亥進士

世祖章皇帝御試詩策三引

陛見特簡庶常旋補驗封又遷禮部己酉典試粵東所取皆名宿時河南二程後裔請如例襲博士當事者以久廢頗難之景仁獨建議上宗伯得報可出知臨洮府值久旱景仁車轍所屆甘澍隨之民稱爲太守雨渭源縣向苦包荒親履往勘悉爲蠲免凡數十萬畝卒于官老幼

皆炷香泣奠日滿戶外先是署有一鹿常出入侍景仁
輿比逝鹿哀鳴不食七日而死又有三白雉翔集柩前
環視而雊如不勝其戚決旬廼去子有謙李
張尙字仙羽山陰人父廷璧教授西山人多從之尙游凌
河時當城破先夕感異夢次日卽受

知遇廷試第一人出知平陽府陞寧夏糧道平王馬亂卽擢
巡撫寧夏再調甘肅左遷濟南叅政歷山西按察福建
右布政陞僉都御史終鄖陽撫治皆有偉績李

馬晉允字晝初餘姚人年十八舉于鄉戊戌成進士以庶
常第一人授編修歷少司成署大司成事康熙壬寅奉

紹興府志

卷之五十

人物志十
鄉賢七

六

命賞

詔出使甘肅道經玉門關有出塞入塞二詩集館中課集道淵

堂近體李

沈引範字康臣山陰人祖綰見列傳父懋庸見義行傳母

姜宗伯逢元女引範在襁褓中有異瑞祖父皆器之稍

長輒究心經史以詩文雄于越當代名流樂與之交戶

外屢常滿也又善音律康熙丁未成進士授中書與修

世祖章皇帝實錄進秩受賞壬子典試江南所拔皆知名士歷官

刑曹每有矜疑終夜不寐獄是以不寃病卒于官所著

有采山堂詩集奚囊隨筆稿李

志

謝泰字彙征會稽人順治己丑進士知湖廣竹山縣竹山古之上庸前明餘寇楊明啟老當當等猶據爲巢窟前令四人皆爲賊害泰初至無城郭棲於山頂鶯崖寨居民二十家時川獠千餘人來攻泰率鄉勇却之而以計縻楊明啟事急乃發書請兵遷民入寨以三十餘人烏銃二具爲死守計卽將蔣崇武來援泰與合兵深入先破泥灣寨擒賊婦馬氏諸寨多降遂攻明啟泰往來督餉值霪雨月餘溪漲不前禱於伏魔廟天果霽明啟方恃險泰用降賊計取山後小逕乘夜入破其寨明啟遁復鈎連劉二虎郝搖旗等帥萬五千人捲土而來鶯崖

紹興府志

卷之五十

人物志十
鄉賢七

七

不可守乃移鐵壁蔣家寨與鄉民八十三人固守時蔣崇武已遷去新帥張士元不任事賊遂破虎伏寨渡河達鐵壁攻羊角寨泰乘間爲書擲搖旗營離間諸賊諸賊果相疑久之知爲泰所給復進兵入竹山破蛟龍樂豐諸寨遂攻鐵壁時癸巳八月也賊築木城周山腹爲長圍泰乃令鄉勇禦其前自堵其後前攻者多中鐵子墮崖下自平旦至日入殺賊二百有奇其後攻者泰自擊之殺賊六百有奇賊乃退後十日賊運竹箭填後陲取平直上泰夜以火毬照之發烏銃斃賊數十人時九月望寨中無水祈禱得雨兵士益厲二虎計窮乃與搖

旗更代圍守泰潛使兩健卒穿木城一赴興安總兵趙
某一赴鄖陽總兵張某求救張援不至惟趙某呼使者
問狀嘆息良久乃命參將張德俊副帥化守登率三千
兵星夜赴援時寨水復竭泰欲自裁忽有四歲啞兒語
曰援兵至矣越一日兵果至圍解因與二將追賊至太
平寨賊多投營崖河死餘賊遂遁泰前後守城與賊相
持數十日追捕殺獲者無筭一邑卒以獲全經畧洪承
疇上其功遷軍前督餉同知後以年老致仕寄居山東
臨清州遂爲州人卒祀忠義祠採訪

姜圖南字滙思山陰人順治己丑進士選庶吉士改御史

紹興府志

卷之五十

人物志十

八

巡視陝西茶馬吳三桂鎮撫秦州軍伍多踰制圖南劾
其無人臣禮巡按兩淮鹽務革桅封革關橋廳稅革餘

鹽鹺政肅清

浙江通志

徐準字式平初名士奇會稽人幼習八比旣而盡裂之別
婦入京觸忿殺人突走山海關偵者疑而拘之遂入開
府幕楊嗣昌奇其才招之往嗣昌驅賊入川諫勿聽嗣
昌死了啟睿引與計事闖賊敗官軍于水坡問準被縛
以計得脫走抵啟睿家備陳賊中事復以計擒通許太
康二賊官啟睿使伏闕上實陳寇情疏崇禎帝見之大
駭面詢狀準曰賊勢燎原人心瓦解國家兵力旣不足

而統馭方畧又無足爲挽回計者惟大破宿習多爲權詭以亂之且稍分事權使便宜可行庶或可救今統兵者必受命督師監軍督師監軍必內承廟筭一往返間而敵之形勢變矣前之所籌後不足用況飄飈叢叵測如此賊者乎今幸其設官分土遲回關隴當亟用間使自相猜貳以賊制賊縱或無效猶小緩東向之勢不然發機已亟京師其正鵠也退復上用間十二策中有取楊永裕妻子及賊謀之在永裕家者帝初未信飛騎縛永裕家果得謀保寧王從賊中至又言準不屈狀遂授準開封同知贊畫軍前隨李建泰以行甫出都兵散準議往河南結土寨至則聞都城已破史可法留準使監黃得功軍遷廬州同知奉命聯絡江西進工部員外得功自剄準與諸將降

王師次年

王師將渡西陵準曰越吾鄉也不可不一救遂詣軍門願自効內院余公素知準薦之貝勒準啟貝勒曰江東必破破則第勿殺吾能招之此皆吾民也至蕭山僅空城徑趨錢清準預遣父老具牛酒迎拜馬前準故詢曰此何地耶則咸對曰太平橋準曰自此太平矣請封刃貝勒曰善遂下令封刃一郡以全授準招撫使使招朱大典

于金華大典自焚死轉之衢失所持符信守衢者遂殺
準越三日

王師薄衢守者降以殺準故誅之子嘉慶當廢官辭不受

河徐公墓表 西河集又載呂師著山陰人旅江南順治二年授江寧通判與守忤罷去三年王師渡績溪將下浙東師著姻家徐準在軍中謀所以全浙東者王師抵錢清師著率父老詣軍前乞哀遂許封授師著三衢教授準死師著徙行求徐屍殮之遂弃官護之歸師著三子皆有異才師著又名王師工詞曲

楊懋經字九有山陰人生有異表既齒左右輔牙長寸許唇勿蔽毋使醫截之有老僧見而驚曰惜哉此封侯相也及長長八尺智勇絕倫時浙東初定餘寇逃入山海者數十屯號白頭兵盜首王三張飛者遣所部傅蘿蔔

紹興府志

卷之五十

人物志十

十

劫安城村懋經往救斬之度賊必報讐集鄉人團練以守賊不敢來乃稱掠鮑瀆假道於懋經懋經佯許設伏以待之殺賊百七十三人王三張飛驚竄乃以厚幣來期會懋經曰降此則村堡寧遂乘小舟攜一蒼頭往說之王三張飛懼率衆入海遊京師數年適張忠元出撫江蘇延與俱南歲甲午湖賊錢應魁聚黨數千肆出焚劫吳江城門爲之書閉江浙兵五千會勦爲賊所鐵乃署懋經爲太湖營總巡懋經募得死士百五十人又造雙櫓船五十餘船募善操者三百人分給之每船拔一黠者厚其食使覘賊水道及洄瀆之爲賊耳目者先捕

殺數十人乃率衆入湖賊出則與戰賊退則盡築諸隘口日將暮則分兵駐隘以守之數月賊憊甚捕魚蝦爲食湖濱民亦不爲賊用乃獲賊妻及僞勅劄船械斬賊先鋒唐四等計賊窮必遁入海密令識其貌者伺海口果獲應魁于黃浦之豆腐濱忠元以聞

賞銀五十兩改署平望營守備復有剿浙寇之捷歲己亥署蘇松水師鎮標中軍守備屯崇明是時海寇鄭成功率衆四十餘萬欲犯金陵由崇明而北總兵梁化鳳所部兵少未敢攖其鋒懋經將渡海僉曰中流有大寇不可行懋經曰有寇正吾輩立功時也率前所募死士乘風

紹興府志

卷之五十

人物志十

七

縱擊殺數百人奪其樓船十餘艘化鳳喜曰有此飛將吾無懼矣遂委兼左前後三營守備事鄭成功圍鎮江總督卽廷佐悉發江寧兵援之而敗鎮江陷進逼江寧懋經與化鳳率四千人馳入江寧成功圍城數重江路絕援兵莫至化鳳部兵屯較場總督以其兵少不足當敵絕勿問會積雨沒脛懋經曰數百里來援而坐死此地可乎乃謁化鳳曰外援絕糧且盡公猶得晏然耶請決一戰死無怨化鳳不可固請之則曰爾往謁軍門乃疾馳謁廷佐請戰廷佐曰敵鋒不可當是猶以羊而投餒虎也懋經曰坐而斃寧與戰願獨率所屬縋城馳敵

營勝則闔門以助敗則甘罪廷佐壯之允其請遂勒所部三百人旦蓐食分列於儀鳳門內自與死士十八人背旗躍城下既摩敵壘乃大呼奮擊敵出不意自相蹂躪而門內三百人亦出合擊賊兵大敗之生擒其將張順而還明日復率數百人出別門與賊戰賊小却叅將李廷棟亦稍稍助之懋經曰敵衆今必爲備當候其隙大挫之六月十七日爲鄭成功生日會將佐飲懋經偵知之神策門臨大江白明初已塞懋經乃獻策化鳳曰昔漢王會諸侯之兵四十萬于滎陽置酒高會項羽選二萬騎還破之此兵家所謂擊其怠也今其時矣請穿

塞乘其醉擊之不破賊甘斬化鳳起揖曰非君不及此請同李廷棟先嘗賊吾統衆卽至約束定日已昃曰賊已醉矣時不可失也先諸將穿塞直搗其中奮呼力戰化鳳兵亦至夾擊之敵潰走亟扼之江復大破之成功僅以數千人遁去乘勝復鎮江是役也懋經獲敵都督二總兵二副將三大纛一首級無算李廷棟無所獲分所獲都督二總兵一讓之成功既敗還率餘衆復困崇明懋經馳救至七了港值賊船一百三十餘一鼓破之殺賊無算圍乃解追奔三十里懋經功第一

御賜袍帽靴襪刀帶等物以旌異之陞崇明鎮左協左營都司世

襲拜他喇布勒哈番遷廣東惠州遊擊康熙初陞兩廣督標中軍副將九年陞山西平陽鎮總兵未赴戰傷發病且革矣猶呼曰大丈夫未罄生平奈何死耶竟嘔血而卒年四十有五子國柱襲姜圖南撰傳

姜希轍字二濱餘姚人世居郡城工部郎中天樞子也明崇禎壬午舉順天鄉試

國初授溫州教授遷知元城縣以卓異入爲戶科給事中轉兵禮二垣辛丑分校會試家居數年復起爲戶科至奉天府承引疾歸希轍名家子曉暢廟堂典故時諫官皆著丰稜侃侃爭是非希轍所論列獨持大體及還家修

紹興府志

卷之五十

人物志十

三

士大夫居鄉之禮凡郡中利害必白當軸者不以嫌怨少避老成夙學若黃宗義蔣平階毛奇齡輩皆館於家以主盟藝林四方之士趨如流水自希轍捐館而前輩風流熄矣年七十八卒子珪字汝臯國子監學正俞志天清一統志希轍在元城鄰郡饑流民蠅至時逃人令嚴無敢收者希轍悉留之令墾荒地受雇得食全活以萬計

周文英字公望山陰人父國奎從張承恩入閩破賊有功授延平副將文英占籍溫州舉康熙庚戌武進士十三年耿精忠反于閩從亂者蠶起洶洶連金衢溫處僞總兵葉重光朱老四及陳耀周彪徐尙朝等十餘萬雜蔽

金華山澤中文英以武弁從征七遇連破之逆賊張元亮屯壽溪文英率兵登山力戰賊敗逃燒其營十八旣而徐尙朝與馮公輔合兵謀復讐屯積道山衆號五萬文英與游擊王世望謀曰吾力寡分擊多不勝不如擣其中堅破則左右皆瑕矣率師從中軍奮擊自己至午裂木城乘勝盡賊之明年復永康縉雲又復處州城皆爲之倡處之嶺曰桃花其鋪曰沿泉者要地也文英慮不取道將梗言于總戎據桃花沿泉兵單弱賊率衆來攻文英以百餘人救之令郭果繞寨西黑林中每繫馬一匹隔二丈許馬離羣長嘶聲振林木又截火繩百段

夾樹枝又哀馬兵三十往來馳騁而已于南面衝突賊疑援兵至懼內外夾擊遂大敗之又擊賊半渡救下河窺連登雲寨斬賊十六人而以己兵易賊服充瞭望已亦換賊衣乘高偵探盡得其實又奪括蒼山先據山上夜用火攻石坂營以南戰石塘鑒大溪灘陷陣生擒僞總兵林福拔江山城于是大兵長驅入閩矣己未擢登州游擊陞潼關叅將潼屬多盜有司不能制懼弁之通報也餽貨幣盡却之私謂人曰彼其畏盜耶某在此何恐迄任無一犯境丁卯陞延綏神木副將神木邊鄂爾多斯民盜種河套地累刑累犯文英憫之曰小民以貧

故陷重法奈何坐視與監司懇疏開邊撫軍難之文英再三懇曰苟有便于民長爲而不破例章上得請初斗米三錢後數年石米一錢

聖祖仁皇帝親征噶爾丹駐蹕五原朝見

行在

賜御書

御箭擢松潘總兵絕苞苴禁私稅立常平倉捐米儲糶又興建衛學以教士卒之子弟番夷無敢騎馬戴帽入城者言及鎮帥咸昨指在鎮十年以老乞歸卒年六十八松人建籌邊樓于城南祀唐李衛公以下名將有功松潘者而

紹興府志

卷之五十

人物志十

主

以文英附文英勇而有謀愛民卹士所在有聲居鄉恂恂仕宦三十年所居猶先人閭廬薄田不供餽粥以父母卒時皆在行間不得盡禮遺命母請祭墓母干求貴人銘子三開緒官知縣猶子開捷官提督

章大來撰
神道碑

胡昇猷山陰人順治四年進士授行人游遷戶部郎中授江西南瑞道調湖東十七年轉福建興泉道山陰李月高許子敬糾黨二千餘應海道鄭成功掠福延漳泉四郡昇猷偕提督馬得功進勦道游擊陳天玉搗洋坑永春等寨捕斬月高子敬餘黨悉伏誅又率叅將張應詔勦泉西賊斬渠王貴及其黨百餘人十八年勦泉南賊

擒柯瑞等十一人山賊劉瓦陳鎮聚眾三千勾海寇踞黃肚寨遣陳天玉奪險奮擊誅之海寇黃昌船二百餘窺黃崎崇武等處以兵一千馳勦令遊擊郭懷守備王承印協攻賊敗走諸役皆昇猷與得功合謀督戰功爲多康熙元年遷江南江寧道十二年補陝西漢興道逆藩吳三桂反漢中當川陝咽喉昇猷調度輸將芻糧備足十三年部臣請陞江南按察使得

旨胡昇猷本當陞補但大兵進勦聞其料理軍需具有才能暫停陞轉事平優敘八月經畧莫洛奏改漢興道爲關南巡道專理漢中事是年冬王輔臣叛於寧羌莫洛被害

紹興府志

卷之五十

人物志十
鄉賢七

其

逆黨阻截棧道漢中糧絕十四年七月鎮西將軍錫卜臣撤漢中兵赴西安昇猷隨行至馬家溝迷路墮馬折指被賊執拷掠楚毒繫獄閱五載不屈十八年十月奮威將軍王進寶恢復漢中昇猷始得脫時大兵進川

上諭胡昇猷陷賊數載備遭困辱守義不屈可嘉授四川按察使二十二年補大理寺少卿累遷左副都御史戶部侍郎調吏部尋擢刑部尙書二十六年降補太常寺卿授左副都御史卒

賜祭葬如例

國史館列傳 俞志昇猷字允大吳三桂反昇猷爲堅守計會修諸葛祠製碑文痛詆叛亂呂父者狗猶不食其餘吳逆見之大怒必欲親殺昇猷被執掠治無完膚又械回漢中七日不食不死就縊復不死擢

任川臬時譚去等尙負固昇歆彈力拒守又家傳妾焦氏與昇歆同囚五載子仁濟知縣

余縉字仲紳諸暨人順治壬辰進士除封邱知縣縣濱河明崇禎末年流賊決河灌開封浸及封邱城堞官舍民居無一存者百姓凋瘵特甚縉百方撫卹治行爲中州冠徵拜山西道御史以終養告歸尋遭艱服闋補河南道巡鹽長蘆又以卜筮請假歸遂不出家居十有六年而卒縉在臺章疏數十上三藩未叛縉請撤其家口於京師復巡撫兵柄相彈壓格於部議不行識者謂老成先見康熙七年浙江提督移駐紹興大帥哈喇庫橫而貪縱鈴下卒白晝攫市金奪人妻女攫其鋒者立破越

紹興府志

卷之五十

人物志十

七

民臥不帖席縉特疏糾之盡臚列其奸狀大帥褫職民慶更生焉楚妖人朱方旦以能言禍福又雜以講學賦詩煽惑海內朝士競趨之至越越紳奉以爲神士民奔走如沸縉目爲妄男子斥之不踰年妖人伏誅其持正如此俞志家傳河南永寇亂後棄地彌望募民開墾子現在之熟田于是所墾復荒難根于熟地縉力請于大吏奏帑之併裁興屯廳道封印與延津接郵置相互民裹飯就役縉請定爲協濟家居佐太守許宏勳城守卒年七十有三

周之麟字石公蕭山人順治己亥進士改庶吉士授檢討歷國子司業侍讀少詹事左遷太僕少卿復晉僉都御史太常卿通政司使卒於位